

Van sente Marien Egyptiake

editie M. Gysseling

bron

Van sente Marien Egyptiake. In: Instituut voor Nederlandse Lexicologie (samenstelling en redactie), *Cd-rom Middelnederlands*. Sdu Uitgevers/Standaard Uitgeverij, Den Haag/Antwerpen 1998.

Zie voor verantwoording: http://www.dbnl.org/tekst/_sen002sent02_01/colofon.php

© 2012 dbnl



[Van sente Marien Egyptiake]

- Sine aten oec el niet al giaer
Dat segghic v allen ouer waer
Naest haren liue drogen si ene hare
Die scarp was ende harde sware
5 Si waren ghehort met eere line
Die hem dede groete pine
Bedden hadden si anders neghene
Daer si vp sliepen dan harde stene
Zosimus was harde blide seere
10 Dat men daer diende so onsen here
Ende dat men daer so penitentie dede
Dat dochte hem en heelech sede
Ende dedese mede ghenendelike
Omdat wilde besitten dat rike
15 Dar moete wi oec in allegader
Dat jonne ons de hemelsce vader
Uoert segghic v wildijt horen
Hare venstren ende hare doeren
Si waren alle besloeten vaste
20 Daer ne quamen ghene gaste
Dar was niemens wandelinghe
Dan der moneke onderlinghe
De stede was heimelijc dar ne quam
No part. no coe. no scaep no lam
25 No ghene beeste wilt no tam
Dat dar binnen den huse qvam
Ne wijnt die daer waide
Ende voer hare dore draide
Aldus ghedaen waes hare canoen
30 Ende dit so wildsi gaerne doen
Hier ombe sende ghod zosimus daer
Dat hare oerdine was so swaer

Want hi hilse wel ende starke
 Al hare pointe ende hare ghewerke
 35 Enen sede hadden si oec die si wel hilden
 Ende niet achter laten wilden
 Dat was alse quamen die vastinen
 Alse hem elc ghoet mensce sal pinen
 Te beterne sine sonden van den iaere
 40 Ende siere worden gheware.
 Tere nuwer pinen ghinghen si dan
 Die daer dede elc ghod man
 Die men daer te doene plach
 Want opten eersten sondach
 45 Dat men groet vastelauent heet
 So was elc monech wel ghereet
 Ende seiden hare biechte alteghader
 Haren abt haren vader
 Alse die biechte was ghedaen
 50 So ghinghen si inden coer staen
 Ene messe dat si dan songhen
 Doude moneke metten jonghen
 Darna sacrement si alle ontvinghen
 Wittu waersi doe ghinghen
 55 En lettel eten van haerre spisen
 Dat ne waren salme no pladisen
 Waer borne ende broet of wellinghen
 Wittu waersi doe ghinghen
 Eende wittu wat doe was haer sede
 60 In capitelen in knieghebede
 Viel si ende daden hare orisoene
 Oemoedelike alse hem staet te doene
 Alse dorisoene waren ghedaen
 Doe ghinghen si voer haren abt staen

- 65 Dar na knielden si alle vor hem
 Ende baden allegader hem
 Dat hi hem debe<ne>dictie soude gheuen
 Dat si die pine dat sware leuen
 Dat si sullen aneghaen
- 70 Daer in si moeten nv wlstaen
 Dat si moeten verdienen dat leuen
 Dat ghod den saelghen sal gheuen
 Doe custe daebt elken an sinen mont
 Ende seide broedre nv vart gesont
- 75 De benedictie die ghod den apostelen gaf
 Doe hier sciet tachterst af
 Die moeti hebben broeders alle
 Newaer hic bidde v al met alle
 Dat ghijt nelaet ghensijns
- 80 Ghine ghedinct ember mijns
 Ende bidt ouer mi mundelinge
 Ende metter herten sonderlinge
 Alsoe doe dorlof ghedaen was
 Elc doe een orisoen las
- 85 Ende alsoe dorisoene waren gedan
 Doe waren die doeren alle ondaen
 Ende elc monec den andren neech
 Toeter aerden ende neder segh
 Ende beghonsten alle singhen o. o.
- 90 Dominus illuminatio mea & salus mea quem timebo.
 Alsoe ghesonghen was dit saluut
 Alsoe die moneke ghinghen vut
 Tere niewer penitentien waert
 Blideleke ende onveruaert
- 95 Jnde woestine danen meenge mile
 Ende waren daer langhe wile

- Sine lieten thuus oec niemene
 Dan enen monec ofte twe
 Die den cloester souden wachten
 100 Niet om dat si om thoet iet achten
 Of dat si hem van den dieuen ontsaghen
 Dat si hem haer ghoet mochten ontdraghen
 Want si ne hadden neghen ghoet
 Armelike het met hem stoet
 105 Maer si lieten daer die twe monke wesen
 Dat si souden singhen ende leesen
 Ende sacre ren ten autare
 En tadt thuus sonder hulpe niet neware
 Elc monec met hem droech
 110 Sulke dinc alse hem ghenoe gh
 Sulc met hem broet nam
 Sulc wellinghe alse hem bequam
 Ende sulc nam el niet dan sijn cleet
 Ende ghinc inde woestine ghereet
 115 Ende nam met hem dat hem voeghede
 Ende in sine herte wel ghenoe ghede
 Si voeren ouer deflume jordane
 Ende elc maecte hem dar teghane
 Dar hijt alre hemelecest wiste
 120 Daer diendi ghode ihesus krijste
 Elc monec van den andren verre sce<e>dde
 Hine wilde niet wat leuene hi ledde
 Dat dat iemene hadde ghesien
 Dar ombe ghinc hi verre vlien
 125 Sonder ghod dor wies eere
 Hi hem daer tormente sere
 Ende als enech den andren sach
 Wildi hoeren wies hi plach

- Hi maecte hem wech tere ander stede
 130 Dat was altoes hare liede sede
 Deen van den andren niet weten wilde
 Jn wat leuene dat hi hem hilde
 Bi crude leefden si inde woestine
 Die si dar vonden ende bi rachine
 135 Alse hem die nature
 Vort brochte hare houde hure
 Sulc die wilden broet si aeten
 Sulc wellinghe ne waer te maten
 Sulc de urucht van den oliuiere
 140 Dat doctem spise harde diere
 Ende bi wortelen ende bi bladren
 Die si achter bosche gadren
 Snachts laghen si neuen der aerden
 Ofte vp stene ofte vp ghaerden
 145 Ene corte wile si doe sliepen
 Alse si doe waecten si riepen
 Te ghode dat hise moeste
 Jn die woestine die ware so woeste
 Laten doen sulke ghewerken
 150 Ende hise der in so moeste ghesterken
 Dat si de bliscap van dar bouen
 Dar b[...]
 Jnt h[...]
 [...] gheblif [...]
 155 [...]
 [...] woestine
 [...]
 [...]
 [...]
 160 [...]

- Ende si dese pine hadden ghedaen
 So moesten si dan thuus waert gaen
 So dat si dan thuus moesten wesen
 Dan ghinghen si singhen ende lesen
 165 Van ons heren pine van siere noet
 Van siere passien van siere doet
 Also si waren thote huus
 Alle die monke comen aldus
 Also alsic v hebbe gheseit
 170 Weet wel ouer wareit
 Dat deen den andren niet vraegde
 Hoe dat hem die pine behaghede
 Of hoe hi leuede indie woestine
 Ende welc gheweest hadde sine pine
 175 Of wat dinghe hi hadde gheten
 Dat wilder niemen van den andren weten
 Ne waer ghod die ouer al can sien
 Ende al weet dat mach ghescien
 Ende alle herten kennet binnen
 180 Ende oec de ghene diene minnen
 Hi wiste wel wat si hadden ghedaen
 Ende hoe si in pinen hadden ghestaen
 Bedie sal ghod hem gheuen dat leuen
 Dat men den salghen sal gheuen
 185 Dit was dordine ente reghele hare
 Dat si dus daden penitentie sware
 [E]lc also gi hier voren
 [H]ebt ghehoert; hadde vercoren
 [E]ne heimeleke stede dar hi in sat
 190 [Ende] ghode ghenade bat
 [H]ine wilde niet dat de liede saghen
 Dat si hem prijs dar af mochten draghen

Alsoe sullen die lieden doen
 Alsi sullen segghen haer orisoen
 195 Si sullen in ene stede vlien
 Dart niemen ne sal moghen sien
 Debedinghe die si dan onsen here
 Segghen es hem bequamelic sere
 Ne waer die sine bedinghe doet
 200 Vor de liede ende hem sijn moet
 Staet dat hier wille hebben of
 Van den lieden prijs ende lof
 Om dat hi toghet sine weldaet
 Dats siere sielen harde quaet
 205 Ende dat sal hi aernen sere
 Te doemesdaghe vor onsen here
 Dese monec zosimas
 Die daer inden cloester was
 Daer hic v af hebbe gheseit
 210 Nader scrifturen wareit
 Hi dede oec mede dese pine
 Ende ghinc oec mede inde woestine
 Ende hi maectem oec te ghane
 Ende voer ouer de iordane
 215 Ende hi droech met hem broet
 Alse hem de hongher dede noet
 Dat hine een lettelt verwerde
 Neghene spise hi el begherde
 Ende hi nam met hem sijn cleet
 220 Ende hi ne hadde el niet ghodeweet
 Dan sinen puren lichgame
 Ende ghinc dart ghode was bequame
 Verre danen inde woestine
 Dar hi in hadde groete pine

- 225 Alsem hongherde broet hi nam want
 Hi aet; ende crude die hi vant
 Nachts so lach hi neuen der aerde
 Want hi elniet ne begaerde
 Dan rustede hi ene curte stont
- 230 Alse hi dan wakede sijn mont
 Ende sine herte te gode baden bede
 Dat hi moeste sijn in sijn ghebede
 Alset doe wart weder dach
 Wildi hoeren wies hi plach
- 235 Hi ghinc dart alre hemelixt was
 Te ghode bat hi ende las
 Ende ember ghinc hi bet voert
 Ende seide duschedane woert
 Lieue ghod alsoe ghewarlike
- 240 Alse ghi sijt hier in hemelrike
 Ende ghi den mensce ghemaket
 Ende de <doet> dor hem ghesmaket
 So moeti mi dar bewenden
 Ende in dese woestine senden
- 245 Daer hi<c> eneghen helegghen mensce moet vinden
 Die mi iet ghoets moete ontbinden
 Ende die mi iet segghe ende leere
 Dies biddic v wel lieue here
 Want hic begh[... d]ese dinc
- 250 Van bi[...] hier [...]c
 Alse [...]
 Ombe [...]
 [...] ende doen hare [...]nt
 [...] wint
- 255 [...]nt none
 [...] te doene

Die hem vloe ende voer hem ghinc
 Zosimus zosimus lieue vader
 Om ghode vergheeft mi dit algader
 260 Dat hic v hebbe doen lopen na mi
 Wildijt weten warbi het si
 Hic bem een wijf al moedernaect
 Swart leelic ende ongheraect
 Jc ne hebbe neghene cleder an
 265 Dar ombe ne mach mi negheen man
 Bescowen no ane sien
 Dar ombe moestic van v vlien
 Dat ghi sout hebben mine wijflechede
 Ghesien ende mine naecte lede
 270 Maer wildi mi een cleed werpen dar neder
 Ende sien dan ouer rugghe weder
 Dat hic mach halen dat cleet
 Dar hic mede mach ghodeweet
 Mine wijflechede decken
 275 Dan so salic totu trecken
 Ende sciegghen v spreken ende bi v staen
 Ende vwe benedictie ontfaen
 Alsoe zosimus dit verhoerde
 Dese tale ende dese woerde
 280 Hi wart vervaert ende ondaen
 So dat cume conste ghestaen
 Want dat soene bi sinen name hiet
 Dies ne conste hem verwondren niet
 Ne ware hi was vroet ende behendech
 285 En te alre ghoeder dinc ghenendech
 Hi pensde in sine herte ende dochte
 Dat soe sinen name niet nomen mochte
 Dien soe noit met oeghen sach

No van hem horde noit ghewach
 290 Maer dat ghod hare hadde laten verstaen
 Die alle dinc hadde saen ghedaen
 Hi dede met haesten dat soe hem riet
 Ende dies ne wildi laten niet
 Hi dede vt sijn ouerste cleet
 295 Ende warpt hare vele ghereet
 Ende kerdem omme met allen leden
 Alsoe hem hadde ghebeden
 Doe quam soe gheloopen althande
 Ende namt cleet met haren handen
 300 Ende bandt vor hare wijflechede
 Ende decter mede hare scaemlechede
 Alsoe ghedect hadde hare sonder beide
 Doe quam soe tote hem ende seide
 Ay lieue vader lieue here
 305 Waerumbe begardi so sere
 Te siene een besondecht wijf
 Die oyt in sonden leedde haer lijf
 Stapphans alsoe vor hem stoet
 So vieli hare vp den voet
 310 Ende hi bat hare harde sere
 Dat soe hem doer onsen here
 Debenedictie soude gheuen
 Ende makene delachtech an hare leuen
 Ter aerden viel soe oec dar neder
 315 Ende hiesch hem debenedictie doe weder
 Nv laghen si bede neder ter aerden
 Ende elc debenedictie gaerde
 So dat men dar elniet mochte horen
 Dan gheft mi debenedictie voren
 320 Gheftse mi ende gheeftse mi

Aldus bede so scieden si
 Darna ouer ene langhe wile
 Dat men mochte gaen ene mile
 Doe spracse tote hem aldus
 325 Wellieue vader zosimus
 Hets recht dat ghi mi benedijt
 Bedie dat ghi een priester sijt
 Ende hebt bi meenghen iaere
 Ghestaen ten helegghen autare
 330 Ende ghesacreert den lichgame ons heren
 Die elc mensce soude eeren
 Alsoe hi dit ghehort heuet
 Leghet hi van vruchte ende beuet
 Ouer dansichte liep hem dat swet
 335 Hi wart cout hi wart heet
 Met siere herten dat hi suchte
 Ende van wondre lach hi ende vruchte
 Gheestelike moeder hi doe seide
 Hic sal v segghen waerheide
 340 Den heelghen gheest hebdi in ende niet el
 Dat es hier openbare wel
 Want ghi mi nooit ne saeght
 Ten eersten bi miere name vraegt
 Ende seit dat hic een priester ware
 345 Hier bi so esset openbare
 Dat de heleghe gheest in v wont
 Ende v al leert dat ghi cont
 Gheeft mi debenedictie om onsen here
 Dies biddic v harde sere
 350 Alsoet niet ontgaen ne mochte
 Doe seide soe ghod diet al gewrohte
 Dat nie inde werelt ontfinc lijf

- Bede man ende wijf
 Ende ghedoeghede groete pine
 355 Om onse verdiente niet om desine
 Ende oec anxene vele groet
 Ende an de cruce daer bleef doet
 Hi moet ons sine benedixie gheuen
 Ende hier so laten ons leuen
 360 Dat wi moeten besitten dat rike
 Dar hi sal wonen ewelike
 Hi antwoerde ende seide amen
 Doe stoeden si op bede te samen
 Doe sprac soe ende seide aldus
 365 Wellieue vader zosimus
 Om wat quamedi te desen wiue
 Sere besondech van haren ljue
 Ne ware ghod die alle dinc kent
 Hic weet wel hi heeft v hier ghesent
 370 Dat hic v lien sal mine sonden
 Daer hic mede bem ghebonden
 Ende ghi dan afflaet
 Sult gheuen van miere mesdaet
 Ay seght mj <h>oet achteraderike es
 375 Ende hoeter in ghescepen es
 Kerstinede hoet wert gherecht
 Hic biddu dat ghijt mi segt
 Ay hoet es metter helegher kerken
 Bisscope papen ende clerken
 380 Grauen keisers ende coninghe
 Hebben si onderlinghe enech ghedinge
 Ende al waerlec gherechte
 Laet het in paise arme knechte
 Zosimus hare antworde ghevet

- 385 Endic dese pine eersten nam
 Dar ombe biddic v dat ghi ghehort
 Mine bede ende mine wort
 Ende ghise doet ghetrouwelike
 Ende bringhet mi sekerlike
- 390 Thelghe tekin tsacrament
 Op de selue wile dar omtrent
 Dat ghod onder sine ionghers sat
 Met hem tere taflen ende at
 Ende vorseidem sine noet
- 395 Sine passie ende sine doet
 Alsoe ghi sijt in vwen cloester danne
 So suldi segghen den here ianne
 Die vwerliede abd es ende vader
 Ende v in hoeden heef algader
- 400 Dat hi hem seluen wel voersie
 Ende sine moneke want bedie
 Dar sal ene dinc ghescien
 Die ghi selue noch sult sien
 Van den monken onderlinghe
- 405 Dewelke sal behoeuen beteringhe
 Maer. dat ne suldi hem niet seggen nv
 Vort ghod gheheten heuet v
 Alsoe soe dit gheseit hadde al
 Lieue uader seghet so ic sal
- 410 Ghaen. doet ember mine bede
 Ende bidt ouer mj oec mede
 Blijft met ghode den hoegsten herde
 Ende hi moetons geuen sinen verde
 Metten hoofde so hem doe nech
- 415 Enter aerden na soe seegh
 Ende maecte hare haesteleke wech

- Ende nam nederwaerts den wech
 Zosimus bleef staende dare
 Ende sach en lanc stic na hare
 420 Dar na so knielde ter aerden
 Ende ghinse loeuen ende waerden
 Ende custe daer so hadde ghestaen
 De voestappe dar soe hadde ghega[en]
 En ten seluen wech die <hi> hadde gen[omen]
 425 Doe hi darwart was comen
 Dien ghinc hi rechte weder keren
 Ende ghode louende met eeren
 Ende riep te hem ende las
 Ende ghinc thuus alset tijt wa[s]
 430 Hi swegh alstille al dat iaer
 Ende van dien dat hi daer
 Hadde ghesien ende ghehoert
 Dies ne seidi niemene een wor[t]
 Ende met sier herten dat hi bat
 435 Te ghode dat hi hem moeste da[t]
 Theelghe ansichte vander vro[wen]
 Laten anderwarf bescowen
 De verlanghenesse sere hem dv[anc]
 Want diaer doctem harde l[anc]
 440 Ende om de heleghe vastine
 Dat de moenke inde woestine
 Souden gaen dies lancdem ser[e]
 Ende batter omme onsen here
 Ende alse de vastine waren co[men]
 445 Ense de moenke hadden vernom[en]
 Opten eersten sondach
 Also men daer te doene plach
 So ghinghen si alle inden co[re]

- [A]lso ghi hoert hier te vore
 450 [E]nde onsen here si daer ontfinghen
 [E]nde vte haren cloestre si ghinghen
 [A]l singhende inde woestine
 [D]ar si in hadden groete pine
 [E]nde inden cloester bleef zosimas
 455 [W]ant hi harde siec do was
 [E]nde hadde den corts dies hi genas
 [E]nde hi was harde blide das
 [D]oe peinsde hi dat ware waerheit
 [D]at soe hem doe hadde gheseit
 460 [E]nde al wildi vte ghaen
 [G]hi sult met euele so sijn beuaen
 [D]at ghi niet vte gaen sult moghen
 [N]o te ghere pine oec doghen
 [A]lse hi doe vander siecheden
 465 Ende van den corts dien hadde gereden
 [W]as ghenesen ente tijt was comen
 [D]at wi palmesondach nomen
 [T]hus die moenke weder quamen
 [V]ter woestinen alle tesamen
 470 [A]lso als men daer plach
 [E]nde opten witten dornesdach
 [D]oe ghinc zosimus te vespertide
 [V]an begharten was hi blide
 [E]nde haesteleke dat hi dede
 475 [M]et begarten der vrowen bede
 [W]ant soe hem harde wel bequam
 [E]n kelc doe dat hi nam
 [E]nde sine bedinghe dar hi seide
 [E]nde ons heren lichgame hi dar in leide
 480 [E]nde hi nam een corfelkijn

Diere dicwile vele in cloestre sijn
 En lettel ighen hiere in dede
 Ente vrucht van den palloen mede
 Ende een wel lettel wellinghen
 485 Met hem droech hi dese .ij. dinghen
 Ende ghinc doe stappans wech
 Ter iordanen den rechten wech
 Ende alsoe hi ter iordanen quam
 Ende hise vor hem vernam
 490 Achter vespertijt het was
 Sine orisoene dat hi las
 Ende ghinc sitten opten oever
 Dat spade was dies was hi drouer
 Der vrowen comste <moeste> hi onbeiden
 495 Hare langhe merren was hem leide
 Want so merrede harde langhe
 Dies was hi seere in bedwanghe
 Ende ember doe ne sliep hi niet
 Maer altoes hi om hare siet
 500 Groete langhenesse ende begaerte
 So haddi om hare in sine herte
 Ende tote hem seluen dat hi seide
 Jc wet wel het es wareide
 So was hier ende kerde te hant
 505 Alsoe soe mj niet ne vant
 Alsoe hi dit hadde gheseit
 Hi viel in knieghebede ghereit
 Ende hi wende groete trane
 Ende riep onsen here dus ane
 510 Wellieue uader wellieue here
 Hic biddu met drouer herten sere
 Dat ghi mj niet ne laet bederuen

- Doe antworddi hare ghereit
 Ay die v nu volghen mochte
 515 Hi mochte sijn blide in sine ghedochte
 Ende vwe heelghe ansichte ane sien
 Wel blide mochti sijn van dien
 O heleghe moeder hic bid v
 Dat ghi mine bede doet nv
 520 Ende neemt een lettelt van derre spise
 Die hic hier brochte ende eet ise
 Den corf so toeghede hi doe hare
 Dien hi met hem brochte dare
 Ende van haren vingre stac soe
 525 Jnden pot metten wellinghen doe
 Jn haren mont stac soe drie grane
 Ende seide soe hadder ghenoch ane
 Ende seide hare gheest ne mochte niet
 Ghedraghen dat soe meer ate iet
 530 Dar na sied soe vader ic biddu sere
 Om de minne van onsen here
 Dat ghi mijns altoes ghedinct
 Als ghi leest ende alse ghi singt
 Ende peinst om mj in vwe ghebede
 535 Ende bidt ouer mi dan mede
 Doe viel hi stappans op hare voete
 Hi cusetse si dochten hem soete
 Ende sine hande hi tegader leide
 Ende al wenende dat hi seide
 540 Vrowe bidt ouer de heleghe kerke
 Bisscope papen ende clerke
 Ende ouer tfolc doet vwe ghebede
 Ende ouer mj oec mede
 Hi weende hi suchte ende jancte

- 545 Ende ghode w[...]
 Met groeter ser[...]
 So sciet hi doe [...]
 Hine dorstese n[...]
 Also so wilde d[...]
- 550 So seinde ander[...]
 Ende settre op[...]
 Ende ghinc ouer[...]
 Ghelijc dat een[...]
 Also soe tersten [...]
- 555 So ghinc soe w[...]
 Doe soe ouer d[...]
 Dat doctem [...]
 Ghode loefdi en[...]
 Ende thuis wa[...]
- 560 Ende hem seluen h[...]
 Ende an hem s[...]
 Ende was torn[...]
 Hoe hem die on[...]
 Dat hi hare din[...]
- 565 Ende soet hem al[...]
 Ende hise twe w[...]
 Vele drouer wa[s ...]
 Ende dicken riep h[...]
 Dat ic vergat o[...]
- 570 Hare te vraghen[e ...]
 Hoe soe hiet dat [...]
 Gharne haddic [...]
 Maer hic pensde a[...]
 Jnt ander jaer [...]
- 575 Haren name we[...]
 Also dit jaer wa[...]

[...]e hadde uernomen
 [...] hi doe ghinc
 [...]ie helghe dinc
 580 [...]adde ghesien
 [...]oe vaste spien
 [...] al dore quam
 [...]nde verre vernam
 [...]e ghaerde
 585 [...]t neuen der aerde
 [...]innen mochte
 [...]iet wesen dochte
 [...]hen harde wide
 [...]ent an elke side
 590 [...]de ende ghinc
 [...]tricen vinc
 [...]beeste spiet
 [...]t hi siet
 [...]eghen verstaerde
 595 [...] hem openbaerde
 [...]hen ne sach
 [...] o wi o wach
 [...] hande hi wranc
 [...]erre sinen ghanc
 600 [...]e hemelwart trac
 [...]at hi sprac
 [...]echt man nie verbat
 [...]holnen scat
 [...]rf hebbe ghesien
 605 [...]waerf ghescien
 [...]scouwen
 [...]te vander vrowen
 [...] harde sere

Lieue uader lieue ghod here
 610 Al wenende doe quam hi gheghaen
 Dar hi de gracht vant vor hem staen
 Dar si tal reerst tegader quamen
 Ende spraken bede doe te samen
 Hi ghinc staen in dusterste side
 615 Sine oeghen ontedi harde wide
 Ende hi sach hare entare
 Of hise iet saghe ende wart gheware
 Daer hi te orient wart sach
 Waer hare lichgame al doet lach
 620 Ende hi sach al openbare
 Datter de sonne op scen wel clare
 Dat doctem mjracle harde scoene
 Want dat dede ghod van den trone
 Ende elke hant wel te pointe leegt
 625 Also men den doeden lieden plegt
 Also ofse iemen hare hadde geleit
 Hi liep te hare doe wel ghereit
 Met sinen tranen dwoch hi hare voete
 Si gauen hem roke harde soete
 630 Haren lichgame ende hare ander lede
 Die ne doersti niet porren mede
 Hi wende vte sinen oeghen trane
 Ende riep sere onsen here ane
 Sine salme al dar hi las
 635 Also alst ghetidech was
 Ende hi seide heleghe worden
 Die ten vighilien do behorden
 Ende bedinghen vter scrifturen
 Ende ghreedde hare sepulture
 640 Tote hem seluen so seide hi

Ende sente marie egyptiake
 Dat soes hem mede oec quite make
 So dat hem ghod wesen moete
 Den ioncsten daghe sochte ende soete
 645 Also hi sijn domsle sal gheuen
 Dar alle dinghe sullun beuen
 Bede cherubin ende scheraphim
 Ende aldat te hemelrike es in
 Dat ghod sine siele moete ontfaen
 650 Ende doense metten ghenen gaen
 Die ghewijst daer werden ewelike
 Ter bliscap ghods van hemelrike
 Dies moetem ionnen de hemelsce vader
 Amen segghet mede nu allegader
 655 Nv hoert noch en lettelt voert
 Van zosimuse recht ghode woert
 Zosimus die indien cloester was
 Hi bat te ghode ende las
 Ende riep die heelghe vrowe ane
 660 Ende weende te hare groete trane
 Ende bat hare alsse waerlike
 Alsoe soe in dit aerderike
 Hadde ghedoegt groete pine
 Daer soe was indie woestine
 665 Dat hise vant bider ghods cracht
 Diene darwart hadde bracht
 Dat soe ghode vor hem bade
 Dat hi hem van alre mesdade
 Moeste ghenadech wesen soe
 670 Dat hi ten ioncsten bleue vroe
 Ende alsi out was hondert iaer
 Ende hadde ghedaen pine swaer
 Van aerderike hi doe versciet

- En tese warelt dat hi liet
 675 Want ghod hine drute haelde
 Ende in hemelrike hine onthaelde
 Ende voer met hem in sinen trone
 Daert ewelike doet wel scoene
 Ende die ingle singhen dar dus
 680 Sanctus sanctus dominus
 Helech ghod helech her sabaoth
 Verre so gaet nu v ghebod
 Nv moeti ons helpen ende beraden
 Dor vwe groete zoete ghenaden
 685 Dat wiere alle comen moeten
 Tier groeter bliscap v versoeken
 Dit was ghemaect in ghoeder kennesse
 M. cc. ende neghentech iaer
 Tote enamme inden cloester daer
 690 Nv verstaet ende hoert hier naer
 Sekerleke dit es oec waer
 So wat mensce so sal wesen
 Dar men desen boec sal lesen
 Ende sinen sijn wel dran leegt
 695 Andat dese boec hier seeght
 Ende hijt wille wel verstaen
 Werdt hi dan in node beuaen
 Of in enegher hande zake
 Sente marie egyptiaka
 700 So salne verloesscen curtelike
 Indien dat hise ghetrouwelike
 Ane rope inder eren onser vrowen
 So sal hem helpen ter ghoeder trowen
 Hec est commemoratio eius
 705 Accinxit fortitudine lumbos suos et roborauit brachium

suum ideoque lucerna eius non extinguetur in sempiternum.
Versus Adiuuabit eam deus uultu suo; Deus in medio
eius non commouebitur. Domine exaudi orationem meam; Et
clamor meus ad te ueniat. Oremus. collecta
Presta quesumus omnipotens deus; ut beate marie
egyptiace natalicia recedentes; meritis ipsius protegamur
et precibus. Per xpistum dominum nostrum. amen.